

1 Korin

¹ Aya Pol, Negur nē oroyam Kristus Jesus nē aposel wō auf nigin iweignan, neda turada Sostenes ado,

² Korin oun Negur nē sios ã bun, pas enei matotkeneik. Ā Kristus Jesus bun fateulei fen, fateul ubodōgouf nigin iweignein, are tamo kayau ganan fire firen difar fen, neda Odug Jesus Kristus, idi neid Odug ado neda Odug ī yana dalesedig anidi geid weim iweignein.

³ Negur neda Tamada ado Odug Jesus Kristus neid wau ifenēya ado wau inosiya, ã bun ibodōf.

Pol Negur De Fiyen

⁴ Aya wededem ã nigin Negur de afiyēdig, ere nigin, yagon wau ifenēya Kristus Jesus bun ã ifenein.

⁵ Ere nigin, Jesus bunem ereb ereb ganan bun, ã kisi feleya ifenein, are āgenei wogō ganan ado keleī ganan bun,

⁶ ere nigin, Kristus nigin neda wogōya, ã bun megeir ifaren.

⁷ Anī nigin, ã neda Odug Jesus Kristus yaorouf nigin wauī fatuk unog fen, tarig mog, ã Awa Uur nē ege luwa taka to lau gef.

⁸ Jesus ã totol irouyeik ile, idikeleya bun ilauf, anī bunem, neda Odug Jesus Kristus isiyouf nē naa bun, ã bouweī od sāf.

9 Negur ī, yagon Naal Jesus Kristus, neda Odug geid, ã nigal gouf nigin iweignein, ī ereb yef, de age fouf bagai.

Sios Atun Fara Fiya

10 Turau tar, aya neda Odug Jesus Kristus yana bunem totol bagai arokeneik, are ã atun fara fiya taka to ibodōf nigin, ã ganan abob nigin wauī tekelei yen ken, ã wauī ado kisi tekelei bagai ubodōgouf.

11 Neu turau tar, tunī Kloe nē ibor bun tamal dirokanan, are ã atun luwa irouya ibodok.

12 Aya enei wogō auf, are eig fiya, ã atun takam irok, “Aya Pol dō afef,” takam irok, “Aya Apolos dō afef,” takam irok, “Aya Pita dō afef,” takag irok, “Aya Kristus dō afef.”

13 Kristus ī fara furu fen de? Aya Pol ī, ã nigin aa tetek bun dun de? ã aya Pol yanau bunem naan digunein de?

14 Aya Negur de afiyek, are aya ã taka to naan agunen, Krispus ado Gaius dogol naan agunēdin.

15 Anī nigin, taka nem to irōf, “Aya Pol yana nem naan agun.”

16 (Momoi, aya Stefanas nē ibor tareg naan agunēdin, anī teten, takag naan agunen be anī, to kisi afef.)

17 Ere nigin, Kristus ī aya naan agunēdiyouf nigin to sur fiyan, anī ere, biya od wogō auf nigin sur fiyan, are Kristus nē aa tetek nē megeir to yalelauf nigin, tamo nē kisi biya wogōya anī bunem sā.

Kristus ī, Negur Nē Kisi Biya Ado Megeir

18 Jesus aa tetek bun laa fen ya od anī, idi inanakelediyouf anidi bun are neneya, anī ere, ada isennadaf bun, od are Negur nē megeir.

19 Ere nigin, Negur nē Itotoya bun eig ye irok:
“Aya tamo kisi biya adodo neid kisi biya daū afalauf,
aya tamo keleī odug adodo neid keleī ale-lauf.”*

20 Tamo kisi biya adodo nain? Tamo keleī odug adodo nain? Sain enei nē keleī yaleya nigin luwa irouya tamo nain? Negur ī tenebur enei nē kisi biya anī to neneya inon de?

21 Negur nē kisi biya bunem, tenebur tamo dogo neid kisi biya anim, Negur nigin to kelein, anī nigin, neneya od dedig anī wogō taudig bunem, idi momoi def anidi isennēdiya nigin, Negur wau al fen.

22 Juda idi memelik nē uris dilouf nigin dirōdig, Grik idi kisi biya anī dimirēdig.

23 Anī ere, ada Kristus aa tetek bun dun anī wogō taudig, od anī Juda idi bun, ye tū fiya od, haiden idi bun, are neneya od,

24 anī ere, idi Juda ado Grik Negurem iweignēdin anidi bun, Kristus ī Negur nē megeir, Negur nē kisi biya.

25 Ere nigin, Negur nē neneya kisi are, tamo nē kisi biya wal fiya, Negur nē folo reya are, tamo nē megeir wal fiya.

26 Turau tar, ã naig be fiya ufareg mog, ã iweignein anī kisi gouf. Â musei sam, tamo nē keleī bunem, kisi biya ado wowā gen. Musei sam

* **1:19:** Asaia 29:14

totol ado wowā gen. Musei sam yeneī ado wowā gen.

²⁷ Anī ere, Negur kisi biya adodo mama ifenēdiyouf nigin, tenebur enei nē neneya igirnēdin. Negur ī megeir adodo mama ifenēdiyouf nigin, tenebur enei nē folo reya igirnēdin.

²⁸ Negur ī tenebur enei nē yeneid sāsā, meleid irim lai difedig ado, ereb taka sā dedig anī igirnēdin, are ereb ado dedig anī, yana sa kalauf nigin age fen,

²⁹ anī bunem, Negur mala bun, taka nem yogo yana to yalesauf.

³⁰ Negur nigin ã Kristus Jesus bun ubodōgef, Jesus ī ada nigin Negur bunem kisi biya wō yen, are ada ī bunem madur bagai, fateul wowā tau fen, isennēyā talen.

³¹ Anī nigin, Negur nē Itotoya bun eig ye irok, “Tamo ī yogo yana yalesef are, Odug ereb age fen anī nigin yana yalesauf.”[†]

2

¹ Turau tar, aya ã gein asi fen, Negur yaor afouf nigin wogō ayein sain bun, aya od biya odug nem be, kisi biya odug nem to wogō aun.

² Ere nigin, aya ã geid tabodon sain, aya ereb ereb ganan wederou tu kel fen, Jesus Kristus ado, ī aa tetek bun laa fen anī dogol kisi afouf nigin kisi afokelen.

³ Sain aya ã gein asin, aya totolou sā, fatuk bagai kumī tererē aun.

[†] **1:31:** Jeremaiia 9:24

⁴ Neu od ado neu wogōya, are kisi biya nē, wauī faleiya nē od bunem sā, Awa Uur nē megeir nē ifelnéyā bunem,

⁵ are āgenei momoiya, tamo nē kisi biya bun to ibodōf, Negur nē megeir bun ibodōf nigin age afen.

Awa Uur Nē Kisi Biya

⁶ Ada kisi biya nē od atīya anidi atun wogō taudig, anī ere, kisi biya anī, are sain enei nē sā, sain enei nē uyu irouya, fau inanakelediyouf anidi neid sā.

⁷ Anī ere, ada, Negur nē waa kisi biya anī, wogō taudig, are iminēyan ibodok, teneub kare fiya sā mog Negur neda fula fiya medeīya nigin mogo igirin anī.

⁸ Sain enei nē uyu irouya takam, kisi biya anī to kelein. Idi kisi biya anī keleim are, idi fula fiya medeīya nē Odug aa tetek bun to dum.

⁹ Anī ere, Negur nē Itotoya eig ye irok kilei:
“Negur nigin waud laa fedig idi nigin Negur dodok fen anī,
malam taka to ilen,
weder takam to karī yen,
kisi takam to fokō yen.”*

¹⁰ Anī ere, Negur yogon Awa Uurem ada bun anī yaor fen.

Awa Uur ī ereb ereb ganan fai yeledig, Negur nē ereb ereb ilon bagaig fai yeledig.

¹¹ Tamo atun aim, tamo taka nē kisi keleī? Are tamo anī nē uurem dogol keleī. Age fiya bagai,

* **2:9:** Asaia 64:4

tamo takam Negur nē kisi keleī sā, Negur nē Awa Uurem dogol keleī.

¹² Ada teneub enei nē uur to talen, anī ere, ada Awa Uur Negur bun tamal talen, are ereb Negur wau sā ifanadan anī, ada keleī youf nigin age tafen.

¹³ Ada enei anī wogō taudig, are tamo nē kisi biya bunem od difelnadan anī bunem sā, are od Awa Uurem ifelnadan anī bunem. Ada Awa Uur nē od bunem Awa Uur nē kisi wogō taudig.

¹⁴ Tamо Awa Uur sā ī, Negur nē Awa Uur bun tamal ereb isif anī to yale iroudig, ere nigin, yogon karīya bun, are neneya. ī anī keleīya nigin kisi feleya sā, ere nigin, are Awa Uur adodom dogol es difedig.

¹⁵ Awa Uur ado tamo ī, ereb ereb ganan nigin es fedidig, anī ere, ī yogo taka nem to es fiyēf.

¹⁶ Negur nē Itotoya eig ye irok:
“Aim Odug nē kisi kelei ken,
ī faded fiyēf?”[†]
Anī ere, ada Kristus nē kisi ado.

3

Sios Bun Fara Fiya

¹ Turau tar, aya ã momoiya nigin atīya gen to ayein, ã teneub enei nē dogol, ã Kristus bun momou gen ayein.

² Aya su afenein, saaf totol anī to afenein, ere nigin, ã anī nigin to saika gen. Momoi, ã gamag fau to saika gef.

[†] **2:16:** Asaia 40:13

³ Ì fau teneub enei nẽ dogol ubodõgef. Ì atun, kkiyeĩ ado luwa irouya ibodok, anĩ nigin, ã fau teneub enei nẽ sã de? Ì teneub enei nẽ tamo gen to ago gef de?

⁴ Takam irok, “Aya Pol dõ afef,” takam irok, “Aya Apolos dõ afef,” ago gouf are, ã teneub enei nẽ tamo sã de?

⁵ Agef ilauf are, Apolos ĩ ai? Pol ĩ ai? Amã Negur nẽ kabĩ tamo dogol, amã bunem ã momoi gen, are Odugem kabĩ morou morou ifanaman kilei.

⁶ Ayam faat atenẽ di, Apolosem naan fen, anĩ ere, Negurem odugouf nigin age fen.

⁷ Anĩ nigin, faat itenẽya tamo ado naan fiya tamo are ege, anĩ ere, Negur ĩ yogo dogol odug, ere nigin, ĩ ereb odugouf nigin age fedig.

⁸ Faat itenẽya tamo ado naan fiya tamo, idi karĩya tekelei ado. Negur idi mugu mugu kabĩ dalen kilei, mala solo ifenẽdiyouf.

⁹ Ere nigin, amã Negur nẽ kabĩ tura tar, ã Negur nẽ kabĩ akor, Negur nẽ fõ.

¹⁰ Negur ĩ aya wau ifenẽya ifanan anĩ bunem, aya fõ inoya keleĩ biya tamo gen, fõ inoya nigin gariya anon, age afe di, taka nem anĩ teten fõ inof. Anĩ ere, tamo mugu mugu el de, lo de fen, fõ dinouf nigin lo difalauf.

¹¹ Ere nigin, fõ gariya inon, are Jesus Kristus, taka nem fõ gariya fire inoya kisi feleya sã.

¹² Tamo takam fõ gariya enei teten, gol, silwa, meein moni odug, aa, yeye be, wit turu nem fõ inouf are,

¹³ yogen kabĩ naig be fiya are yaorouf, ere nigin, Kristus nẽ naa bun, anĩ lalan bun irousí

inouf. Are yā ado wō ye di, yā anim tamo mugu mugu nē kabī nē kaū es fouf.

14 Ī ereb inon anī ifarlauf are, ī yogon mala solo yalouf.

15 Ī ereb inon anī isaikalauf are, ī agogon youf. Ī yogo Negurem kel yalouf, anī ere, ī yā malan tamal ulō yesiya tamo gen ibodōf.

16 Ā aug are Negur nē tempel, Negur nē Awa Uur ā namein ibodōdig anī, ā to keleī de?

17 Taka ī Negur nē tempel daūf fouf are, Negur ī tamo anī daūf irailauf, ere nigin, Negur nē tempel are fateul, are ā tempel anī.

18 Ā aug to udegnēgouf. Āgenei taka ī, gama sain enei nē keleī bunem, aya kisi biya ado yef are, ī neneya wō youf bagai, are ī kisi biya ado wō youf nigin age fouf.

19 Ere nigin, Negur mala bun, teneub enei nē kisi biya are neneya. Negur nē Itotoya eig ye irok kilei, “Negur ī, kisi biya adodo tamo dogo neid keleī anim kor bun dilelel mog, gei fedidig,”*

20 Negur nē Itotoya takag irok, “Odug ī keleī, kisi biya adodo tamo neid kisi, are ege.”†

21 Anī nigin, tamo yeneid to walesagauf! Ere nigin, ereb ereb ganan are āgenei,

22 Pol, Apolos, Pita, teneub enei, mata ibodōya, laa, gama be, dumen, ereb ereb ganan, are āgenei,

23 ā Kristus nē, Kristus ī Negur nē.

* **3:19:** Job 5:13 † **3:20:** Sam 94:11

4

Kristus Nē Aposel Tar

¹ Anī nigin, tamo idi, amā nigin, idi Kristus nē kabī tamo tar, Negur nē waa lo fiya nigin idi imeid bun inon de fen, kisi difouf.

² Tamo idi ereb lo difouf nigin imeid bun inon anidi, dogo neid marau sigor dō difef dile, age difouf anī, marau orof.

³ Ā aya es wiyagef be, tamo nē kot bun es difiyaf, are aya to sii fiyaf. Momoi, aya yug nagineg to es afedig.

⁴ Neu kisi are karētut, anī ere, anim aya mosor sā to auf. Odug im aya es fiyaf.

⁵ Anī nigin, es fiya nē sain fau wōya sā mog, to es gouf. Tari gef uleg, Odug isiyouf bun. Ī ereb gugum bun iminek anī lalan bun irou isi fen, tamo neid waud bun kisi ibodok anī yaor fouf. Sain anī bun, idi mugu mugu Negur bun yana odug dalouf.

⁶ Turau tar, gama aya, āgenei biya fiya nigin, ereb enei arokenein, aya yug ado Apolos bunem, afelnein, anī bunem, ā wogōya eig fiya nē gariya, are amā bun keleī walogouf, “Itotoya bun yenek anī to ufodulagauf.” Ā anī keleī youf are, ā tamo taka anī yana waleseg fen, taka to lai gouf.

⁷ Ere nigin, aim ō, taka wal fiya inenok? Ō mogo ado, ere anī ō to walen? Ō mogo anī walen ouf are, ere nigin ō anī to walen gen, ogo yanā walesef?

⁸ Ereb ā oroyeik ganan ā mogo ado. Ā mogo safina kisi feleya bagai ubodōgef. Ā mogo king wowā gen, are amā geid sā. Amā ā geid king

wowā tauf nigin, ã momoi bagai king wowā gem anī, aya orouf bagai.

⁹ Ere nigin, aya kisi afef, Negur ī amā aposel, tamo yukesiya nigin dinenēdig gen, tamo dilouf nigin, gī bun idikeleyan bagai inenaman. Saa teneub ado, are tamo ado engel meleid bun, amā fele difamāf nigin inoman.

¹⁰ Amā Kristus nigin neneya mabodok, anī ere, ã Kristus bun kisi biya bagai ubodōgef. Amā totol sā mabodok, anī ere, ã totol ubodōgef. Æ yeneī dalesedig, amā yanamā to dalesedig.

¹¹ Kulu nem isi gama sain enei bun, amā naū ado naan ail mayok, amā gabar masasak mafilaik, amā darau difanamak, amā fō sā.

¹² Amā mug imamam kabī totol maledig. Sain amā disisnamak are, amā el fiya mafenēdidig. Amā darau difanamak are, darau anī faali mafedig.

¹³ Bouwamā bun od duk sain, amā molol nem od solo mafedig. Mabodok masi gama sain enei bun, amā teneub enei nē ido gen ado, ereb ereb ganan nē moto gen wō maun.

¹⁴ Aya ã mama ifeneīya nigin enei to atotof, anī ere, ã neu kesu tar oboiyou gen wedereī arouf nigin age afef.

¹⁵ Ere nigin, Kristus bun, ã ten tausen kulat tamo ado, anī ere, ã temeī musei sā, are aya Kristus Jesus bun biya od bunem temeī wō aun.

¹⁶ Anī nigin, aya ã madē wiyagauf nigin totol bagai arokeneik.

¹⁷ Gariya enei nigin, aya neu kesu Timoti, ī Odug bun aya oboiyou ado dō fiya biya, ã gein

sur afef. Im Kristus Jesus bun, neu mata ibodōya nē suma anī, ã wedereī fokō fouf, are aya modoū ganan sios ganan bun afelnēdidig age fiya bagai.

18 Ñ tunī, Pol ī amā garan to isiyouf ge fen, ã aug yeneī walesegen.

19 Anī ere, Odug orouf are, aya kaisā bagai ã gein asiyouf, age afe fen, aya dogo yeneid yaleseya tamo eneidi naig de wogō def anī sā, anī ere, ereb megeir idi ado anī fele afouf.

20 Ere nigin, Negur nē tano are ege wogōya nē sā, are megeir nē.

21 Ere anī ã oroyeik? Aya wagagā yeīya nigin tibog ado ã gein asiyouf de, wau laa fiya ado molol bunem asiyouf?

5

Tureī Noli Tobonunā Ado Walelnēgouf!

1 Ñ atun, noli tobonunā age fiya, are haiden atuneg to wō yedig anī, ibodok yeya karī aun. Tamo taka ī tama nē kayau we fedig.

2 Age fe di, ã aug selī wabigedig! Age fiya ban, ã wauī gudūf fen, tamo tobonunā enei inof anī, ã genei uyu kū fiya bun walelnēgouf, are deuf.

3 Aya bouwau ã geid to ibodok, anī ere, uur bun are, aya ã geid tabodok. Aya ã geid ibodōya gen, tamo enei age fen, are ī mogo es afiyen.

4 Ñ neda Odug Jesus yana bunem guru gouf bun, aya uur bun ã geid tabodōf, are neda Odug Jesus nē megeir ibodōf sain bun,

5 tamo enei Satan ima bun unenēg, anī bunem, mosor nē bouwa daūf iraile fen, Odug nē naa bun yogen uur isennēyā yalouf.

6 Ì yeneï yaleseya are to biya. Yis naal bagai flawa obu namen kabï yaledig anï, ã to keleï de?

7 Ì flawa mata yis sã gen wõ gouf nigin, yis tubu anï waleleg, are ã anï flawa mata yis sã. Ere nigin, Kristus, neda Pasa naa nẽ sipsip naal, sesewi difiyen.

8 Anï nigin, ada Pasa Sifa naa anï tarouwauf, are yis tubu, sesen ado to biya nẽ yis bunem sã, anï ere, bret yis sã, karëtut ado momoi nẽ bret bunem age tafouf.

9 Aya ã noli tobonunã dinodig tamo kayau geid to nigal gouf nigin, neu pas mogo atotkenein,

10 anï ere, aya teneub enei nẽ tamo kayau geid to nigal gouf nigin to orok, are idi noli tobonunã, ereb ereb nigin akorouya, idegëya bunem taka nẽ safina bë yaleya be, idegëya waitou yana yaleseya age difedig. Ì idi geid to nigal gouf are, ã teneub enei utorõgouf.

11 Anï ere, gama aya ã bun atotof are, ã taka ï yogo nigin tura ye fen, noli tobonunã, ereb ereb nigin akorouya, idegëya waitou yana yaleseya, bou yüya od wogöya, naan yöya be, idegëya bunem taka nẽ safina bë yaleya age fedig, ï weim to nigal gouf. Tamo age fiya ado weim saafeg to wägauf.

12 Ere nigin aya idi sios mayarë difaref anï es afediyouf? Are, idi sios namen difaref anï ã to es wiyëdigef de?

13 Negur idi sios mayarë difaref anï es fediyouf. Are Negur nẽ Itotoya bun eig ye irok kilei, “Ì atun

tamo sane anĩ walelnẽgouf.”*

6

Momoiya Tamo Kayau Atun Kot Fiya

¹ Āgenei takam, taka adofefuya yenẽf are, ere nigin ĩ Negur nẽ tamo kayau wagedin irouleya ban, ĩ idi momoiya sã anidi bun, mama sã gen es fiya nigin irouledig?

² Are Negur nẽ tamo kayau teneub enei es difouf anĩ, ā to keleĩ de? Ā teneub enei es gouf are, ā morõ naal bagai es fiya nigin kisi feleya sã de?

³ Are amã engel es mafediyouf anĩ, ā to keleĩ de? Age fouf are, mata ibodõya enei nẽ morõ es fiya nigin naig fiyauf?

⁴ Anĩ nigin, ā teneub enei nẽ morõ age fediya niginfefuya adouf are, ā haiden idi, sios bun tamo yeneid sã anidi, es fiya tamo nigin ugirnẽdigef de?

⁵ Aya ā mama yeif nigin od enei orok. Are ā atun, momoiya tamo kayaufefuya idi atun ibodok anĩ, es fiya nigin kisi biya ado tamo taka sã de?

⁶ Anĩ ere, momoiya tamo takam tura taka kiwai ifen ken, kot bun iledig, are enei momoiya sã anidi wagedin irouledig.

⁷ Momoi bagai, ā atun abob nigin kot bunfefuya ibodok anim, ā mogo kuku gen anĩ yaoref. Ere nigin ā idi to utornẽdige di, sane diyeif? Ere nigin ā idi to utornẽdige di, didegneif?

⁸ Age fiya ban, ā aug udegẽg fen, sane ago gedig, are ā turei tar bun enei ago gedig.

* ^{5:13:} Diuteronomi 17:7; 19:19; 21:21; 22:21, 24; 24:7

⁹ Tamo toboununā sesen idi, Negur nē tano to akorouf anī, ã to keleī de? Are ã idi to utornēdige di, didegneif. Idi noli toboununā dinodig, idi idegēya waitou yana dalesedig, idi seseirā toboununā dinodig, tamo idi bouweid na nē sur difedig, tamo tutur, kayau tutur noli toboununā dinodig,

¹⁰ idi bē daledig, idi ereb ereb safina nigin akorou dedig, idi naan dōdig, idi bou yūya od wogō dedig, idi idegēya bunem taka nē safina daledig anidi ganan, Negur nē tano to akorouf.

¹¹ Are ã tunī age fiya anī ago gedig. Anī ere, ã mosor bun tamal kulo yein, are ã fateul inenein, are ã, Odug Jesus Kristus yana bun ado neda Negur nē Awa Uur bunem, Negur mala bun madur bagai wowā gen.

Noli Toboununā

¹² Taka irōf, “Aya ereb ereb ganan nigin sā age afeid kisi feleya.” Are de momoi, anī ere, ereb ereb ganan to isennadauf. Aya ereb ereb ganan nigin sā age afeid kisi feleya, anī ere, aya ereb takam to irouna di, ferfer abodōf.

¹³ Taka irōf, “Saaf are te guroub nē, te guroub are saaf nē.” Anī ere, Negur anī ganan daū falauf. Bouwa are noli toboununā nē sā, anī ere, Odug nē, are Odug ī bouwa anī nē.

¹⁴ Are, Negur yogan megeir bunem Odug laa bun tamal yalesnen, are adag ī yalesnadauf.

¹⁵ Ñ bouweī are, Kristus yogo bouwa nē tunī anī ã to keleī de? Age fiyauf are, aya Kristus bouwa nē tunī ale fen, kayau bouwa na sur fedig ado bagu afouf de? Sā bagai!

16 Tamo ī yogo, kayau taka bouwa na nē sur fedig ado bagu difouf are, ī kayau anī ado bouwa tekelei youf anī, ā to keleī de? Ere nigin, Negur nē Itotoya bun eig ye irok, “Idi urom bouweid tekelei youf.”*

17 Anī ere, taka ī yogo Odug ado bagu difouf are, ī uur bun Odug ado tekelei youf.

18 Noli toboununā bun tamal uyagauf. Mosor tunī ganan tamo taka inof, are ī yogo bouwa serē inof, anī ere, taka ī yogon bouwam noli mosor inof, are ī yogo bouwa bun mosor inof.

19 Ā bouweī are Awa Uur Fateul nē tempel, Awa Uur Fateul are ā namein ibodok anī Negur bun tamal walegen are, ā to keleī de? Ā aug, āgenei sā,

20 ere nigin, ā mala odugem na yaleyein. Anī nigin, bouweī anim Negur yana walesagauf.

7

Tamo Kayau Ado Bagu Fiya Nigin

1 Gama od anī ā utotogen nigin arokeneik, tamo ī kayau to yalouf, are deuf.

2 Anī ere, noli toboununā musei bagai ibodok nigin, are tamo mugu mugu ī yogon kayau adouf, are kayau mugu mugu ī yogon tamo adouf.

3 Tamo ī yogon bouwa nigin, yogon kayau to katū fiyēf, age fiya gen, kayau īg yogon bouwa nigin yogon tamo to katū fiyēf.

4 Kayau ī yogon bouwa nē mudur to ibodōf, are yogon tamo nē, age fiya gen, tamo ī yogon bouwa nē mudur to ibodōf, are yogon kayau nē.

* **6:16:** Jenesis 2:24

5 Ì abob nigin bouweï to katû gouf, anï ere, ã kosë gouf nigin, sain naal bagai yo ge fen, bouweï katû gouf, are kisi falauf. Agog fen, ã bouweï kulatun fiya anï, malai nigin, are Satanem to kisi yeïf nigin, baban ã bouweï bagu gouf.

6 Aya od enei karï gouf nigin orok, are ïtäfiya sã.

7 Tamo ganan aya gen dibodok, are aya orouf. Anï ere, tamo mugu mugu idi, Negur bun dogo neid ege luwa dalef, taka ege luwa enei, taka ege luwa anï.

8 Anï ere, aya kayau tamo yaleya sã, tamo kayau yaleya sã ado, waab arokenëdif, are idi aya gen age de dibodok dilauf, are deuf.

9 Anï ere, idi dogo bouweid nigin kulatun fiya kisi feleya sãf are, tamo idi kayau dalouf, kayau idi tamo dalouf, ere nigin, noli kisi waud bun yã gen bobo reya anï ban, tamo idi kayau yaleya, kayau idi tamo yaleya are deuf.

10 Tamo idi kayau adodo, kayau idi tamo adodo bun, aya od enei arokenëdif, are ayam sã, Odugem. Are kayau ï ne tamo to itornëf.

11 Anï ere, kayau ï tamo itornëf are, ï tamo taka to yalouf be, are ï yogon tamo ado komo difouf. Are tamo ï yogon kayau to iru irailauf.

12 Ì tunï ganan bun, aya od enei arokenëdif, are ayam, Odugem sã. Tura taka ï kayau ado, are kayau ï momoiya sã, anï ere, ï tamo ado ibodöya nigin oro fouf are, tamo ï kayau anï to iru irailauf.

13 Kayau taka ï tamo ado, are tamo ï momoiya sã, anï ere, ï kayau ado ibodöya nigin oro fouf are, kayau ï tamo anï to iru irailauf.

14 Ere nigin, tamo momoiya sā ī, yogon kayau bunem fateulen, are kayau momoiya sā ī, yogon momoiya tamo bunem fateulen. Age fiya sāf are, ā gereī tar idi karētut to dibodōf. Anī ere, idi gama fateul dibodok.

15 Anī ere, taka ī momoiya sā, iyawau fenē nigin oro fouf are, utornēge di, age fouf. Suma age fiya bun, momoiya tamo be kayau, ereb taka anim to katī fiyek. Are Negur ī ada wau inosiya bun tabodōf nigin iweignadan.

16 Kayau ō, nē tamo usennēf be sā be anī, naig fe di, ō keleī youf? Tamo ō, nē kayau usennēf be sā be anī, naig fe di, ō keleī youf?

17 Odug ada mugu mugu igirnadan kilei ado, Negur ada mugu mugu iweignadan kilei bagai, age tag, mata tabodōgouf. Are, aya sios ganan bun nun enei anof.

18 Sain Negur ī tamo taka iweignen, tamo ī mogo mulū ilen de? Are tamo ī mulū ileya sā to ilauf. Sain Negur ī tamo taka iweignen, tamo ī mulū ileya sā de? Are tamo ī to mulū ilauf.

19 Mulū ileya are ege, mulū ileya sā areg ege. Anī ere, Negur nē ītāfiya dō fiya anī odug bagai.

20 Tamo mugu mugu ī Negur iweignen sain bun, ī ibodon suma anī bun, agef ibodōf.

21 Sain Negur ī iweignon, ō ferfer ubodon de? Ō anī nigin to morō yōf, anī ere, ō ferfer itorōyā nigin kisi falauf are, anī ō agouf.

22 Ere nigin, taka ī, Odugem iweignen sain bun, ferfer ibodon, ī Odug nē karika tamo ibodok, age fiya gen, taka ī iweignen sain bun, karika tamo ibodon, ī Kristus nē ferfer ibodok.

23 ã mala odugem na yaleyein. ã tamo neid ferfer to wowã gouf.

24 Turau tar, tamo mugu mugu ï Negur iweignen sain bun ibodon suma anã bun, agef Negur ado dibodõf.

25 Kayau taulei nigin, aya Odug bun tamal ïtâfiya taka to alen. Anã ere, aya, taka ï Odug nẽ wau yüya bunem momoi bagai tamo wõ yen anã, aya neu kisi afeneik.

26 Gama enei nẽ morõ odug nigin, aya kisi afef, are tamo ï gama ibodok gen, agef ibodõf, are deuf.

27 Õ kayau ado de? Age fiyauf are, õ kayau iru iraileya nigin naab to umirëf. Õ kayau to walен de? Age fiyauf are, õ kayau taka yaleya nigin to umirëf.

28 Anã ere, õ kayau walef are, õ mosor to unof. Kayau taulei taka tamo yalef are, ï mosor to inof. Anã ere, tamo kayau dalef, kayau tamo dalef, idi mata ibodõya enei bun morõ musei dalouf, are aya morõ enei ã bun to wõ youf anã orouf.

29 Turau tar, aya od enei arokeneik, are sain mogo tobegaf, anã nigin, gama sain enei ilef bun, idi kayau ado, idi kayau sã gen dibodõf;

30 idi maruid isif, idi to maruid isif gen dibodõf; idi waud al difef, idi waud to al difef gen dibodõf; idi ereb taka na dalef, idi ereb taka sã gen dibodõf;

31 idi teneub enei nẽ safina diroudif, are idi waud adok anã bun to dinouf. Ere nigin, teneub enei, gama agef ibodok anã, inanakalauf.

32 Aya ã to suwë gouf nigin orouf. Tamo kayau sã, ï Odug nẽ kabõ nigin kisi fedig, are ï ereb age

fe di, Odug al fouf nigin kisi fedig.

³³ Anĩ ere, tamo kayau ado, ĩ teneub enei nẽ bouwa isennẽya nigin kisi fedig, are ĩ ereb age fe di, yagon kayau al fouf nigin kisi fedig.

³⁴ Age fe di, yagon kisi fara fedig. Kayau tamo sã be, kayau taulei, ĩ Odug nẽ kabĩ nigin kisi fedig, are ĩ bouwa ado uur bun fateul wõ youf nigin age fedig. Anĩ ere, kayau tamo ado, ĩ teneub enei nẽ bouwa isennẽya nigin kisi fedig, are ĩ ereb age fe di, yagon tamo al fouf nigin kisi fedig.

³⁵ Aya od enei ãgenei biya fiya nigin orok, aya ã ifõyeif nigin to age afef, anĩ ere, ã madur agog fen, ã aug nigin Odug bun fara fiya sã wenẽgouf nigin age afef.

³⁶ Anĩ ere, tamo taka ĩ, kayau taulei yaleya nigin digirnen anĩ, ĩ bun tobununã biya sã age afef ye fen, kayau ĩ tamo yaleya nẽ sain mogo wal fe di, tamo ĩ kayau yaleya nigin kisi fef are, tamo ĩ yagon oroya kilei age fouf. ĩ mosor to inof, are idi bagu difouf.

³⁷ Anĩ ere, tamo ĩ yagon wau bun totol ifar fen, taka nẽ kisim to we fiyẽf, anĩ ere, yagon oroya dõf fen, kayau taulei anĩ to yalouf nigin yagon kisi ifõf are, areg ĩ tutuk age fouf.

³⁸ Anĩ nigin, tamo ĩ kayau taulei yalef are, ĩ tutuk age fef, anĩ ere, tamo ĩ kayau to yalef are, ĩ tutuk bagai age fef.

³⁹ Kayau ĩ yagon tamo fau mata ibodõf are, ĩ yagon tamo ado dibodõf. Anĩ ere, yagon tamo laa fouf are, ĩ yagon oroya dõf fen, taka bun ileya kisi feleya, anĩ ere, tamo ĩ Odug nigin momoi yef anĩ bun dogol.

40 Anĩ ere, neu es fiya bun, kayau ĩ gama ibodok gen, ibodõf are, ĩ fatuk bagai al fouf. Aya kisi afef, are ayag Negur nẽ Awa Uur ado.

8

Saaf Idegëya Waitou Bun Sesewi Difen

1 Gama, saaf idegëya waitou bun sesewi difedig nigin, ada keleĩ, are ada ganan keleĩ ado. Keleĩ are yogo yana yaleseya inodig, anĩ ere, wau laa fiya anim biya yalesedig.

2 Tamo ĩ ereb taka nigin aya keleĩ yef are, ĩ ereb taka keleĩ youf anĩ ĩ fau keleĩ sã.

3 Anĩ ere, tamo ĩ Negur nigin wau laa fef are, Negur ĩ nigin keleĩ.

4 Anĩ nigin, saaf idegëya waitou bun sesewi difedig anĩ yõyä nigin, ada keleĩ, are tenebur ein idegëya waitou are ege, anĩ ere, Negur taka sã, tekelei dogol ibodok.

5 Ere nigin, saa be teneub bun, idi waitou dedig anĩ dibodok, are momoi bagai waitou musei ado odug musei dibodok,

6 anĩ ere, ada bun Negur tekelei dogol ibodok, are Dei, ĩ bun tamal ereb ereb ganan wõ yen, ĩ nigin ada mata tabodok. Odug tekelei dogol ibodok, are Jesus Kristus, ĩ bunem ereb ereb ganan wõ yen, ĩ bunem ada mata tabodok.

7 Anĩ ere, tamo ganan enei keleĩ sã. Tamo kayau tunĩ fau idegëya waitou nigin fatuk bagai kisi difedig nigin, sain idi saaf anĩ doko, idi saaf anĩ idegëya waitou bun sesewi difen de fen, kisi difedig, age dife di, idi waud totol sã nigin, amuyëdig.

8 Anī ere, saafem ada Negur non to irouladauf, are ada saaf to tāf are, anim ada to daū fadauf, ada saaf tāfeg, anim ada to isennadauf.

9 Anī ere, ereb ā karika ago gouf anim, idi momoiya totol sā anidi bun, naabura gudū fiya to wenēdigouf nigin lo walagauf.

10 Ere nigin, taka ī wau totol sā anī, ō keleī enei ado, idegēya waitou nē tempel bun saaf wō mog ileyōf are, ī saaf idegēya waitou bun sesewi difen anī, kumī sā to yāf de?

11 Anī nigin, turā totol sā, ī nigin Kristus laa fen, are ogon keleim ī daū fiyek.

12 Sain ā naab enei bun tureī tar bun mosor unog fen, dogo neid waud totol sā anī daū wedigef are, ā Kristus bun mosor unogef.

13 Anī nigin, ereb aya āf anim neu turau mosor bun inenēf are, ayam ī mosor bun to anenēf nigin, aya muda baban to bagai āf.

9

Aposel Ereb Yaleya Nigin Kisi Feleya

1 Ereb takam aya katī fiyaf de? Aya aposel sā de? Aya Jesus neda Odug to ailen de? Ā Odug bun neu kabī bunem to wō gen de?

2 Tunī bun aya aposel sā be, anī ere, momoi bagai aya ā bun aposel. Ere nigin, ā Odug bun aya aposel kabī alef anī nē uris.

3 Idi aya es difiyauf nigin dibodok anidi bun, isennaya od enei orok.

4 Amā saaf ado naan yōya nigin to kisi feleya de?

5 Amā, aposel tunī ganan, Odug nē tura tar ado Pita age difedig gen, kayau momooya ado amā geid marou malauf, are to kisi feleya de?

6 Takag, aya ado Banabas dogol mata ibodōya nigin kabī malouf de?

7 Aim kusī tamo kabī yale fen, yogo nigin ereb ereb na yaledig? Aim wain kabier wain iten ken, dogo neid biya to yōdig? Aim sipsip lof fen, dogo neid su sumin to yōdig?

8 Aya tamo nē lo fiya bunem dogol, od enei orok de? Lo anīg enei nigin tekelei bagai to irok de?

9 Ere nigin, Moses nē Lo bun eig ye itoton, “Ó bulmakau, wit faat biya nē gabar loko fediyouf nigin lalai feid mog, yagon awa to ufokalauf.”* Negur ī bulmakau nigin kisifef de?

10 Momoi, Negur ī od enei ada nigin to irok de? Momoi, od enei ada nigin itoton, ere nigin, tamo teneub gudū fedig ado, tamo wit faat biya nē gabar yaledig, idi kusu fiya sain bun dogo neid morou morou dalouf nigin waud ise fen, age difedig.

11 Amā ā atun āgenei uur nigin faat mararan ouf are, amā ā bun bouwa buru nē safina kusu mafouf are, anī odug biya de?

12 Tunī ā bun isennēyā enei yaleya nigin kisi falauf are, amā idi wal fiya anī, to malouf de?

Anī ere, amā ā bun safina yaleya nigin kisi feleya enei to age mafen. Age fiya ban, amā Kristus nē biya od to naabura gudū mafouf nigin, ereb ereb ganan faali mafef masin.

* **9:9:** Diuteronomi 25:4

13 Idi tempel bun kabī daledig anidi, dogo neid saaf tempel bun daledig, idi alta bun aruna daledig anidi, ereb alta bun sesewi difen anī dale dogoledig, are ā to keleī de?

14 Naab tekelei anī bun, Odug iron, are idi biya od wogō def anidi, biya od bunem mata ibodōyā nē safina dalouf.

15 Anī ere, aya safina yaleya nigin kisi feleya eneidi, anī taka to age afen. Age afe fen, aya, ā aya nigin ago gouf nigin, enei to atotof. Takam yanau yaleseya enei aya bun yalelauf are, aya laa fiyauf anī orouf.

16 Aya biya od wogō auf sain bun, aya yug nigin yanau to alesedig, ere nigin, Negurem biya od wogō auf nigin nugo fiyadig. Aya biya od to wogō auf are, aya bun morō odug bagai wō youf.

17 Aya neu oroya bunem kabī enei alouf are, aya mala yaleya kisi feleya. Are neu oroyam sā, anī ere, aya Negurem kabī ifanan nigin age afef.

18 Age afouf are, ere anī neu mala solo? Are, sain aya biya od wogō auf, aya mala yaleya sā biya od wogō audig, are aya biya od bun mala yaleya nigin kisi feleya anī to age afedig.

19 Aya tamo taka nē sā, are aya karika, anī ere, aya tamo musei kisi feleya bagai gei afouf nigin, aya yug tamo ganan nē ferfer wō auf.

20 Juda idi bun, aya Juda idi gei afouf nigin, Juda tamo gen wō aun. Idi lo farumen dibodok anidi bun, aya yug lo farumen to abodok, anī ere, aya idi lo farumen dibodok anidi gei afouf nigin, aya tamo lo farumen ibodok gen wō aun.

21 Idi lo sā anidi bun, aya Negur nē lo bun karika sā, are aya Kristus nē lo farumen abodok,

anī ere, aya idi lo sā anidi gei afouf nigin, aya tamo lo sā gen wō aun.

²² Idi furūyā anidi bun, aya idi furūyā anidi gei afouf nigin, aya tamo furūyā gen wō aun. Aya erek erek ganan kisi feleya anī bunem, tunī kel gei afouf nigin, tamo ganan bun, idi dibodok gen tobounā age fiya gen wō aun.

²³ Aya biya od nigin enei ganan age afedig, are aya biya od nē el fiya weim talouf nigin.

²⁴ Gududuya bun, tamo ganan gududu dedig, anī ere, tekeleim dogol mala yaledig anī ā to keleī de? Naab age fiya bun, gududu ge fen, mala walogouf.

²⁵ Tamō ganan kodē wal difouf nigin age difedig anidi, erek erek ganan bun totol bagai tai difedig. Idi mala fau sa kalauf anī dalouf nigin age difedig, anī ere, amā mala gai gai ibodkalauf anī yaleya nigin age mafedig.

²⁶ Anī nigin, aya tamo gariya sā gudu redig gen, to gudu raudig. Aya yau yūdig gen, to ege imau warū yeledig.

²⁷ Anī ere, aya yug bouwau au ken, anī neu ferfer ibodōf nigin age afedig, are aya tunī wogō afiyeid fen, aya yug mala solo yaleya nigin, kisi feleya sā to bagai wō auf nigin age afedig.

10

Israel Neid Tubuid Tar Bun Weder Irouya Od

¹ Turau tar, aya ā enei to keleī youf nigin to orouf, are Moses nē sain bun, tubuda tar ganan budū farumen difar fen, idi ganan Maaī Giriya atu diyok dilen.

² Idi ganan budū bun ado maaī bun naan dale fen, Moses nē ibor tar wowā den.

³ Are, idi ganan uur nē saaf tekelei anī don,

⁴ idi ganan uur nē naan tekelei anī don, are uur nē meein idi geid weim diyok dilen anī bun, idi naan don, meein are Kristus.

⁵ Anī ere, Negur ī idi musei ganan nigin wau to al fen, anī nigin, dogo neid bouweid gerere tuan firagagaū difen.

⁶ Enei ganan ada wederada irouya nigin wō yen, anī bunem ada idi age difen gen, ereb sane nigin wauda to tanouf.

⁷ Idi neid tunī gen, ā idegēya waitou yana to walesagauf. Are Negur nē Itotoya bun eig ye irok, “Tamo kayau saaf naan doko dibod ken,fafā de dale, noli toboununā dinon.”*

⁸ Ada idi tunī age difen gen, noli toboununā to tanouf. Age dife di, naa tekelei bun, idi atun tuwenti tri tausen tamo kayau gare den.

⁹ Ada idi tunī age difen gen, Odug kisi fiya bun to tanenēf. Idi age difen, gogourum didenkesin.

¹⁰ Ada idi tunī gen, to nauseir tauf. Idi age difen, daū fiya nē engelem idenkesin.

¹¹ Eneidi ada ifelnadauf nigin idi bun wō yen, are idikeleya sain, ada bun mogo wō yen anī bun, wederada irouya nigin itoton.

¹² Anī nigin, tako ī kisifef, totol ifaref yef, ī to kubū youf nigin lo falauf.

¹³ Kisi fiya ganan ā bun wō yedig, are tamo bun wō yedig dogol. Anī ere, Negur ī age afouf yef anī, age fedig, ī kisi fiya ā yaleya kisi feleya sā anī, ā

* **10:7:** Eksodas 32:6

bun to wō youf nigin age fouf. Anī ere, ā kisi yeīf sain bun, Negur ī iyawoya nē naab anīg ifelneīf, anī bunem ā totol ufaragauf nigin sā kisi falauf.

Saaf Idegēya Waitou Bun Dinon Ado Odug Nē Saaf

¹⁴ Anī nigin, neu turau tar oboiyou, idegēya waitou yana yaleseya bun tamal uyalalagauf.

¹⁵ Aya ā tamo kayau kisi biya ado gen arokeneik, ereb aya arok anī, ā aug es gouf.

¹⁶ De fiyēya nē kap, ada de fiya tafenēdig, are Kristus nē naud bun bagu fiya sā de? Bret ada mumā tafedig, are Kristus nē bouwa bun bagu fiya sā de?

¹⁷ Bret tekelei dogol ibodok nigin, ada musei, anī ere, bouwada tekelei, ere nigin, ada ganan bret tekelei anī bun bagu tafedig.

¹⁸ Israel tamo kayau nigin kisi walogouf, idi sesewi fiya nē saaf dōdig anidi, alta bun to bagu difedig de?

¹⁹ Age fouf are, ere anī kisi afef, are sesewi fiya nē saaf idegēya waitou difenek anī odug de, oo idegēya waitou anī odug de?

²⁰ Sā, anī ere, haiden neid sesewi fiya anī kaa sesen bun difenēdidig, are Negur bun sā. Are aya ā kaa sesen geid bagu gouf nigin to orouf.

²¹ Ā Odug nē kap bun ado kaa sesen neid kap buneg yōya nigin kisi feleya sā. Ā Odug nē tebol bun ado kaa sesen neid tebol buneg bagu fiya nigin kisi feleya sā.

²² Ada Odug kiyeī ifanadauf nigin age tafe de? Ada neda megeir ī wal fiya de?

Momoiya Tamo Kayau Neid Tobonunā

²³ Tunī dirōdig, “Ada ereb ereb ganan nigin, sā age tafeid, age fiya nigin kisi feleya,” anī ere, ereb ereb ganan to isennadauf. Tunī dirōdig, “Ada ereb ereb ganan nigin, sā age tafeid, age fiya nigin kisi feleya,” anī ere, ereb ereb ganan biya fiya to inouf.

²⁴ Taka ī yogon biya fiya nigin to imirēf, anī ere, tunī neid biya fiya nigin imirēf.

²⁵ Ereb ereb yaro maket bun na sur difedig anī, āgenei kisi bun to fiya sā wāgauf,

²⁶ ere nigin, “Teneub ado ereb ereb ganan anī namen yenek are Odug nē.”[†]

²⁷ Momoiya sā tamo taka, saaf yōya nigin ā iweigneī di, ā ileya nigin oroyeīf are, ereb ereb ā meleī bun inodin anī, āgenei kisi bun to fiya sā wāgauf.

²⁸ Anī ere, taka ī ā irokeneīf, “Enei are sesewi fiya bun difenen,” youf are, tamo irokenein ī nigin ado kisi es fiya yaor karētut ibodōf nigin, saaf anī to wāgauf.

²⁹ Neu wogōya nē gariya are, tamo anī nē kisi es fiya nigin, are āgenei kisi es fiya nigin sā. Taka nem irōf, “Age fiyauf are, ere nigin neu ereb ereb nigin kisi feleya anī, tamo taka nē kisim es fouf?

³⁰ Aya de fiya bunem saaf āf are, ere nigin taka nem saaf anī nigin, Negur de afiyek nigin bou yūya od irok?”

³¹ Anī ere, ā saaf wāgauf, naan wāgauf ado, ereb ereb ganan ago gouf are, Negur nē fula fiya medeīya nigin anī ganan ago gouf.

[†] **10:26:** Sam 24:1

³² Juda tamo, Grik tamo be, Negur nē sios bun tamo taka, to ye tū fouf nigin ago gouf.

³³ Ayag naab ganan bun tamo ganan al afiyēdiyouf nigin age afedig gen, ago gouf. Ere nigin, aya neu biya fiya to amirek, anī ere, musei isennēdiyouf nigin, dogo neid biya fiya amirek.

11

¹ Ayag Kristus madē afiyēdig gen, ā aya madē wiyagauf.

Negur Yana Yaleseyə Bun Mudur Kerū Fiya

² Aya ā yeneī alesef, ere nigin, ā ereb ereb ganan bun aya nigin karī weleg fen, ifelnēya anī aya ale fen, ā afenein anī, kafī weleg uroug usigef.

³ Anī ere, aya ā eig fiya anī keleī youf nigin orouf, are tamo ganan neid mudur are Kristus, kayau nē mudur are tamo, Kristus nē mudur are Negur.

⁴ Tamo ganan, taka ī yogon mudur kerū fel fen, kosē yef be, profet od wogō yef, ī yogon mudur Kristus mama ifenek.

⁵ Kayau ganan, taka ī yogon mudur to kerū fel fen, kosē yef be, profet od wogō yef, ī yogon mudur, are aiwa anī mama ifenek, are ī yogon fatiya korerē feleya gen.

⁶ Kayau taka ī yogon mudur kerū fiya sāf are, ī yogon fatiya gudū falauf. Kayau taka ī yogon fatiya gudū fouf be, korerē fouf anim, mama ifenēf are, ī yogon mudur kerū fouf.

⁷ Tamo taka ī yogon mudur to kerū fouf, ere nigin, ī Negur nē malakanon ado fula fiya medeīya,

tamo bun. Anĩ ere, kayau ĩ tamo nẽ fula fiya medeĩya, kayau bun.

⁸ Ere nigin, tamo ĩ kayau bunem to isin, anĩ ere, kayau ĩ tamo bunem isin.

⁹ Takag, tamo ĩ kayau isennẽf nigin to inon, anĩ ere, kayau ĩ tamo isennẽf nigin inon.

¹⁰ Age fiya nigin, kayau ĩ, engel idi neid meleid bun, ĩ tamo farumen ibodok anĩ ifelnẽdiyouf nigin, yogen mudur kerũ fouf.

¹¹ Anĩ ere, Odug bun kayau ĩ tamo bun yogo mugu to ifaref, tamo ĩg kayau bun yogo mugu to ifaref.

¹² Ere nigin, kayau ĩ tamo bunem isin gen, tamo ĩg kayau bunem wõ yen. Anĩ ere, ereb ereb ganan Negur bun tamal isif.

¹³ Ā aug es gouf, are kayau taka ĩ yogen mudur to kerũ fel fen, Negur kosẽ fiyek, are de de?

¹⁴ Tamo taka fatiya salo isiya adouf anim mama ifenek anĩ, tamo nẽ toboununã anĩ to ifelneik de?

¹⁵ Anĩ ere, kayau taka ĩ fatiya salo isiya adouf, are yogen fula fiya medeĩya. Ere nigin, fatiya salo isiya are, yogen mudur kerũ fiya nigin ifenen.

¹⁶ Anĩ ere, taka ĩ od enei kiwai ifenẽf are, ada suma taka sã, Negur nẽ sios bune suma taka sã.

Odug Nẽ Saaf

(Matyu 26:26-29; Mak 14:22-25; Luk 22:14-20)

¹⁷ Faded fiya dõ fiya enei bun, aya ā yeneĩ to alesef, ere nigin, āgenei guru fiya biya anĩ fotokar sane isidig.

¹⁸ Uruwa bun, aya karĩ aun, are ā sios nigin guru gef ā atun, fara fiya yenẽdig, age afe fen, od tunĩ aya momoi auf.

¹⁹ Ā atun fara fiya bagai yenek, anī bunem, ā atun ai anī Negur yo fiyen anī ifelneif.

²⁰ Anī nigin, sain ā guru gef, are Odug nē Saaf bagai anī to wōgedig,

²¹ ere nigin, sain ā saaf wōgef bun, ā abob tari fediya sā, mugu mugu saaf wōgedig, anī nigin, taka ī naū ibodōdig, taka ī naan yōdig.

²² Saaf ado naan yōya nigin ā fō sā de? Ā Negur nē sios lai ge fen, idi safina sā anidi mama wenēdigef de? Aya ā ere ayeif? Aya enei nigin ā yenei alesauf de? Sā bagai! Aya enei nigin ā yenei to alesauf.

²³ Ere nigin, aya enei Odug bun tamal ale fen, āg afenein. Are Odug Jesus, Judas ī kiwai ifenen bō anī bun, bret yale,

²⁴ Negur de fiye ken, bret anī mumāf fen, iron, “Enei neu bouwau, are ā nigin. Aya nigin karī walagauf nigin enei ago gouf.”

²⁵ Naab tekelei bun, bō saaf bure difel fen, ī kap yale fen, iron, “Kap wain enei neu naudou bun bar itenēya mata. Sain ganan ā wāgauf, aya nigin karī walagauf nigin enei ago gouf.”

²⁶ Ere nigin, sain ganan ā bret enei wōg fen, kap enei bun wāgauf, ā Odug nē laa nigin kurō wesig mog, ī fau isiyouf.

²⁷ Anī nigin, taka ī tutuk sā bret anī yāf be, Odug nē kap bun yāf are, ī Odug nē bouwa ado naud bun mosor inouf.

²⁸ Taka ī yogo nigin es fel fen, bret anī yoko, kap anī bun yāf.

²⁹ Ere nigin, taka ī Odug nē bouwa nigin to kisif fen, bret yoko, kap bun yāf are, ī yogon es fiya anī

yogo yoko.

³⁰ Anĩ nigin, ã atun musei malegeid fen, dagi didig, ãgenei tunĩ gare den.

³¹ Anĩ ere, ada nigin es tafouf are, ada es fiya bun to tabodõf.

³² Sain ada Odugem es fadauf, are ada Odugem madur fadauf, are ĩ teneub enei nẽ tamo kayau geid ada mosor ado to youf nigin age fouf.

³³ Anĩ nigin, neu turau tar, sain ã yõya nigin guru gouf are, ã abob nigin tari gouf.

³⁴ Taka ĩ naũ fouf are, ĩ fõ bun yãf, anĩ bunem, sain ã guru gouf, ã es fiya bun to ulagauf.

Sain aya asiyouf, aya faded fiya tobol afeneif.

12

Awa Uur Fateul Nẽ Ege Luwa

¹ Turau tar, aya ã Awa Uur Fateul nẽ ege luwa nigin to keleĩ youf anĩ to orouf.

² Ñ keleĩ, sain ã haiden ubodõgen, naab fire fire bun ditonei ken, eweid ifofakeleya idegëya waitou bun, fõ yeleya nigin dirou dileyein.

³ Anĩ nigin, aya ã arokeneik, are taka ĩ Negur nẽ Awa Uur bunem wogõ yef, ĩ to irõdig, “Jesus sane lauf.” Takag, taka nem eig ye irõya kisi feleya sã, “Jesus ĩ Odug,” are Awa Uur Fateulem dogol.

⁴ Ege luwa nigin fire fire dibodok, anĩ ere, Awa Uur anĩ tekelei.

⁵ Kabĩ gariya fire fire dibodok, anĩ ere, Odug tekelei.

⁶ Kabĩ nẽ megeir fire fire dibodok, anĩ ere, Negur tekelei ĩ, tamo ganan bun, kabĩ nẽ megeir ganan nigin kabĩ yaledig.

⁷ Tamo ganan isennēdiyouf nigin, tamo mugu mugu bun Awa Uur yaor fedig.

⁸ Taka bun Awa Uur bunem kisi biya nē od ifenek, taka bun Awa Uur tekelei bunem keleī nē od ifenek,

⁹ taka bun Awa Uur tekelei bunem momoya anī ifenek, taka bun Awa Uur tekelei anī bunem dagi el fiya nē ege luwa ifenek,

¹⁰ taka bun memelik inoya nē megeir ifenek, taka bun profet od ifenek, taka bun uur es fiya ifenek, taka bun od fire fire nem wogōya ifenek, taka bun od fire fire nem wogōya anī falei fiya ifenek.

¹¹ Enei ganan Awa Uur tekelei dogol ī yogon kabī, ī yogon oroya dōf fen, tamo kayau mugu mugu anī ifenēdidig.

Bouwa Tekelei, Fara Fiya Musei

¹² Bouwa anī tekelei, anī ere, bouwa anī fara fiya musei bunem inof. Yogon fara fiya ganan are musei, anī ere, idi bouwa tekelei dinof. Kristus īg age fiya.

¹³ Ere nigin, ada ganan, Juda tamo be Grิก tamo, ferfer be kafī fiya sā tamo, Awa Uur tekelei bunem naan tale fen, bouwada tekelei wō taun, agef fen, ada ganan Awa Uur tekelei naan gen tokon, megeir talouf nigin ifanadan.

¹⁴ Bouwa ī fara fiya tekeleim to inof, anī ere, fara fiya museim inof.

¹⁵ Ye ī, aya ima sā, anī nigin, aya bouwa nē tunī sā youf, anī ere, gariya anī bun ī aya bouwa nē tunī sā yeza kisi feleya sā.

¹⁶ Takag, weder ī, aya mala sā, anī nigin, aya bouwa nē tunī sā youf, anī ere, gariya anī bun ī aya bouwa nē tunī sā yeya kisi feleya sā.

¹⁷ Bouwa adok malauf are, nainenem karī wouf? Bouwa adok wederouf are, nainenem sumeī walouf?

¹⁸ Anī ere, momoi, Negur ī bouwa nē fara fiya, ī orof kilei bagai, mugu mugu ganan inenēdin.

¹⁹ Bouwa nē fara fiya anī ganan tekelei youf are, bouwa ī nain ibodōf?

²⁰ Age fiya gen, bouwa nē fara fiya musei dibodok, anī ere, bouwa de tekelei.

²¹ Mala ima to irokenēf, “Aya ō to orouf!” Are, mudur ye to irokenēf, “Aya ō to orouf!”

²² Age fiya ban, bouwa nē fara fiya tunī totol sā tailedig anī sāf are, bouwa ibodōya kisi feleya sā.

²³ Ada bouwa nē fara fiya yana sā gen tauf anī, ada yana talesedig. Ada bouwa nē fara fiya yaor fiya kisi feleya sā anī, dede ta, ed tafedig,

²⁴ anī ere, bouwada nē fara fiya yaor fiya kisi feleya anī, ada to dede ta, ed tafedig. Anī ere, Negur ī bouwa nē fara fiya bagu feleid fen, fara fiya yana sā idi yana odug ifenēdin,

²⁵ anī bunem, bouwa bun foi fiya to ibodōf, anī ere, bouwa nē fara fiya idi abob nigin kilei kilei kisi difouf.

²⁶ Bouwa nē fara fiya takam darau yalouf are, bouwa nē fara fiya ganan ī geid darau daledig. Bouwa nē fara fiya takam yana yalouf are, bouwa nē fara fiya ganan ī geid kulī dedig.

²⁷ Gama, ã Kristus nē bouwa, are ã mugu mugu anī nē fara fiya.

²⁸ Sios bun Negur ī uyulil aposel ganan igirnēdin, anī dō fiya profet, anī dō fiya tise, age fe di, memelik inoya tamo ado, dagi el fiya nē megeir dalen anidi, tunī isennēdiya nigin kisi feleya anidi, ereb ereb lo fiya nigin megeir dalen anidi, od fire fire nem wogōya nigin kisi feleya anidig igirnēdin.

²⁹ Idi ganan aposel de? Idi ganan profet de? Idi ganan tise de? Idi ganan memelik dinof de?

³⁰ Idi ganan dagi el fiya nē megeir dalef de? Idi ganan od fire fire nem wogō def de? Idi ganan od fire fire nem wogōya anī falei difef de?

³¹ Anī ere, Awa Uur nē ege luwa odug yaleya nigin kisi totol walogouf.

Gama aya naab gai biya bagai taka afelneif.

13

Wau Laa Fiya

¹ Aya tamo nē od fire fire nem ado engel nē od nem wogō aufeg, wau laa fiya sāf are, aya belo gaōya be, kadod ait gūya gen dogol.

² Aya profet od wogōya nigin Awa Uur nē ege luwa ado fen, Negur nē waa ganan ado keleī ganan kelei ken, arei godo fiya nigin momoiya odug ado, anī ere, wau laa fiya sāf are, aya tamo ege.

³ Aya ereb aya ado ganan maleg afeneid fen, bouwau atorō di, yā malan dirāf, anī ere, aya wau laa fiya sāf are, aya mala biya taka to alouf.

⁴ Wau laa fiya are molol, wau laa fiya are dor yaleya. ī to kiyei inodig. ī yogo yana to yalesedig. ī yogo to seli yabidig.

5 Í tobonunā sane sā, í yogo nigin aya dogol to yedig, í kaisā to seye yedig, í sane difiyek anī to karī yeledig.

6 Wau laa fiya anī sane nigin to kulī yedig, anī ere, momoi nigin kulī yedig.

7 Í famud kulatun fedig, í famud momoi yedig, í famud wau isedig, í famud feseya sā megeir ifaredig.

8 Wau laa fiya are to bagai sa kalauf. Anī ere, profet od wogōya are sa kalauf, od fire fire nem wogōya are sa kalauf, keleī are sa kalauf.

9 Ere nigin, ada keleī tunī dogol kelei ken, profet od tunī dogol wogō taudig,

10 anī ere, sain kibo feleya bagai anī isiyouf, kibo feleya bagai sā anī sa kalauf.

11 Aya simō bun, aya simō gen wogō aun, aya simō gen kisi afen, aya simō gen karī aun. Sain aya biyau fen, aya simō nē tobonunā dumeun arailen.

12 Gama ada dodo bun gen malakanon yaor sā tailedig, sain ada tarabā fadauf bun tutuk bagai tailauf. Gama aya tunī dogol keleī, sain anī bun Negur aya nigin ganan keleī gen, aya ganan keleī youf.

13 Are gama towo eneidi difaref, momoiya, wau iseya ado, wau laa fiya. Anī ere, anī atun wau laa fiya anī odug bagai, ganan wal fiya.

14

*Profet Od Wogōya Ado Od Fire Fire Nem
Wogōya Nigin Awa Uur Nē Ege Luwa*

¹ Wau laa fiya nē naab dōg fen, Awa Uur nē ege luwa yaleya nigin kisi totol walogouf, Awa Uur nē ege luwa bun profet od wogōya nē anī bagai walogouf.

² Ere nigin, taka ī od fire nem wogō yef, ī tamo to wogō fiyēdif, anī ere, ī Negur wogō fiyek. Are, taka nem in od to keleī youf. ī Awa Uur bunem Negur nē waa wogō yef.

³ Anī ere, taka ī profet od wogō yef, ī tamo megeir ifenēdiyouf nigin, waud yalesauf nigin ado, waud yo fouf nigin wogō fiyēdif.

⁴ Taka ī od fire nem wogō yef, ī yogo dogol isennek, anī ere, taka ī profet od wogō yef, ī sios isennek.

⁵ Aya ã ganan od fire fire nem wogō gouf nigin orouf, anī ere, aya ã profet od wogō gouf nigin orouf bagai. Taka ī od fire nem wogō yef, ī sios isennēf nigin taka nem yogen od to falei fouf are, taka ī profet od wogō yef anim, taka ī od fire nem wogō yef anī wal fiya.

⁶ Turau tar, aya ã gein asi fen, od fire nem wogō auf sain bun, aya kurō fesiya od tunī, keleī, profet od be, faded fiya nē od, ã bun to arou asiyouf are, ere biya aya ã afeneīf?

⁷ Ereb idi mata sā aitedif, digē be gita age fiya, idi ailō fire fire to dinouf are, naig fe di, taka nem ere seg kodē def anī keleī youf?

⁸ Takag, taur ait tutuk to wō youf are, aim kusī nigin dodok fouf?

⁹ Āg age fiya. Ā, āgenei baleim od fire nem yaor to wogō gouf are, taka ī naig fe fen, ã wogō gef anī keleī youf? Ā ege od yau bun urarāgouf dogol.

10 Tenebur ein od fire fire musei dibodok, anĩ ere, idi gariya sã taka to ibodok.

11 Aya ereb taka nem wogõ yef, anĩ nẽ gariya to keleĩ youf are, aya wogõ yef anĩ nẽ yaũ tamo, age fe di, ĩ aya bun yaũ tamo.

12 Āg age fiya. Ā Awa Uur nẽ ege luwa yaleya nigin kabĩ totol walededig, anĩ nigin, sios isennẽya nẽ ege luwa yaleya nigin kabĩ totol walogouf.

13 Age fiya nigin, taka ĩ od fire nem wogõ yef, ĩ ereb wogõ yef anĩ falei fouf nigin kosẽ youf.

14 Ere nigin, aya od fire nem kosẽ auf are, neu uur kosẽ yef, anĩ ere, neu kisi faat yūya sã.

15 Anĩ nigin, aya naig afouf? Aya neu uur bun kosẽ auf, anĩ ere, aya neu kisi buneg kosẽ auf. Aya neu uur bun seg alouf, anĩ ere, aya neu kisi buneg seg alouf.

16 Ō ogon uur bun Negur yana walesauf are, taka ĩ idi anĩ to keleĩ anidi atun ibodok, ĩ ereb õ urok anĩ keleĩ sã nigin, naig fe fen, ĩ ogon de fiyẽya bun “Momoi” youf?

17 Ō ogon de fiya are biya bagai, anĩ ere, taka to usennek.

18 Aya ā ganan wal yeĩya, od fire nem wogõ auf nigin Negur de afiyek.

19 Anĩ ere, sios bun, aya ten tausen od od fire nem wogõya anĩ fotokar, tunĩ tai fediya nigin od faif bun yaor wogõ auf anĩ orouf.

20 Turau tar, āgenei kisi bun simõ gen to ufareg. Sane nigin, momou nẽ kisi gen ufareg, anĩ ere, āgenei kisi bun biyeĩ ufareg.

21 Lo bun eig ye itoton:
Odug irok,

“Tamo od fire nem wogō def anidi bunem ado,
 yaū tamo sigoreid bunem,
 aya tamo kayau eneidi wogō afediyouf,
 anī ere, sain anī buneg idi aya to karī di-
 fiyauf.”*

²² Anī nigin, od fire nem wogōya are, momoiya
 tamo kayau bun uris sā, anī ere, momoiya sā
 tamo kayau bun uris. Anī ere, profet od wogōya
 are, momoiya tamo kayau bun, momoiya sā tamo
 kayau bun sā.

²³ Anī nigin, sios guru fiya odug bun, tamo
 kayau ganan od fire nem wogō de di, tunī anī
 keleī sā be, tunī momoiya sā disiyouf are, idi ā
 nigin wadā ideneik to douf de?

²⁴ Anī ere, taka ī momoiya sā be, taka ī anī
 keleī sā, tamo kayau ganan profet od wogō de
 mog, isiyouf are, ī tamo kayau ganan neid wogōya
 bunem ī mosor tamo ya anī kisi fokō ye di, tamo
 kayau ganan ī es difiyēf,

²⁵ age dife di, yagon wau bun iminēdig anī
 yaorouf. Anī nigin, ī kusureis fen, Negur yana
 yales, “Momoi bagai, Negur ā atun ibodok,” youf.

Negur Yana Suma Dōf Yaleseyə

²⁶ Anī nigin, turau tar, ada naig tafouf? Sain ā
 guru gef, ā ganan atun taka seg ado, taka faded
 fiya nē od ado, taka kurō fesiya od ado, taka od
 fire nem wogōya be, od fire nem wogōya anī falei
 fiya adof. Anī ganan sios megeir fiya nigin ago
 gouf.

²⁷ Taka ī od fire nem wogō youf are, uru be,
 towom dogol age fiya sain dale fen, teke tekeleim

* ^{14:21:} Asaia 28:11, 12

wogō douf. Age fe di, taka nem od fire nem wogōya anī falei fouf.

²⁸ Od fire nem wogōya anī falei fiya tamo sāf are, wogōya tamo ī sios bun foro yel fen, yogo ado Negur bun wogō youf.

²⁹ Profet uru be, towom age fiya wogō douf, age de mog, tunī ganan, ereb wogō yef anī el de es difouf.

³⁰ Anī ere, idi guru fiya dibodok anidi atun, kurō fesiya od taka, taka bun isiyouf are, uyu wogō yef are dē yalauf.

³¹ Ere nigin, ā ganan sain waleg fen, teke tekeleim profet od wogō gouf, anī bunem, ganan keleī dale fen, waud yalesauf.

³² Profet neid uur are profet dogo kulatun dife fen, dogo neid wogōya sain bun dogol wogō douf.

³³ Ere nigin, Negur ī ekul fiya nē Negur sā, ī wau inosiya nē Negur.

Tamo kayau fateul neid sios ganan bun age difedig gen,

³⁴ kayau idi sios bun foro del difarauf. Idi wogōya nē modoū to difenēdiyouf, anī ere, idi Lo irok kilei, anī dō difouf.

³⁵ Idi ereb taka nigin to fiya orodiyouf are, idi neid fō bun dogo neid tamo to difediyouf, ere nigin, kayau taka sios bun wogōya are mama ado.

³⁶ Negur nē od ā bunem gariya inon de? Od anī ā bun dogol isin de?

³⁷ Taka ī kisif, ī profet taka be, ī Awa Uur nē ege luwa alen youf are, ī ereb aya atotkeneik are Odug nē ītāfiya ya anī keleī youf.

³⁸ Taka ī enei welebi fouf are, ī yogo welebi fiyēf.

³⁹ Anī nigin, turau tar, profet od wogō gouf nigin kisi totol walogouf. Agog fen, od fire nem wogōya nigin to katū wiyēdigouf.

⁴⁰ Anī ere, ereb ereb ganan suma bagai dōg fen, biya bagai ago gouf.

15

Kristus Nē Mata Kel Fāya

¹ Turau tar, aya biya od wogō ayeī di, waleg fen, anī teten ufaregef anī, baban ā kisi turī ayeīf nigin orouf.

² Ā od aya wogō ayein anī, uroug kafī waleg fen, ege to momoi gen ouf are, biya od enei bunem ā kel gei yeīf.

³ Ere nigin, ereb aya alen, are odug bagai nigin, uyulil anī aya ā afenein, are Kristus ī, Negur nē Itotoya bun yenek kilei, neda mosor nigin laa fe di,

⁴ ī mū difen, are Negur nē Itotoya bun yenek kilei, naa towo bun ī mata kel fā yen,

⁵ are ī Pita bun wō ye fen, anī dumen in dō fiya tar tuwelf bun wō yen.

⁶ Anī bure fele di, ī sain tekelei bun tura tar faif handred wal fiya meleid bun wō yen, anidi ganan musei fau dibodok, tunī gare den.

⁷ Agef fen, ī Jems mala bun wō yen, anī dumen aposel ganan meleid bun wō yen.

⁸ Anī ganan bure fel fen, idikeleya bun, ī, aya kesu gō fiya sain sā bun gō difiyan gen anī, malau buneg wō yen.

⁹ Ere nigin, aya aposel idi atun naal bagai, aya to biya nigin aposel yeza nigineg kisi feleya sā, ere nigin, aya Negur nē sios darauf afenen.

¹⁰ Anī ere, Negur nē wau ifenēyā bunem, aya gama afaref gen age wō aun. Aya bun yogon wau ifenēyā anī ege to ilen. Sā, aya kabī totol idi ganan wal fediya alen, are ayam sā, anī ere, Negur aya ado ibodon in wau ifenēyā anim.

¹¹ Age fiya nigin, ayam be, idim, amā enei wogō mauf, are ā enei momoi gen.

Gare Den Tamo Neid Mata Kel Fāya

¹² Amā Kristus gare den anidi bun tamal mata kel fā yen anī wogō maudig, anī ere, naig fe di, ā tunī, gare den anidi mata to ke de fā douf gedig?

¹³ Gare den anidi, mata to ke de fā douf are, Kristus īg mata to kel fā yem.

¹⁴ Kristus ī mata to kel fā yem are, nemā wogōyā anī kaū sā di, āgenei momozi areg kaū sam.

¹⁵ Age fiyam are, amā Negur nigin idegēyā od wogō maudig anī dilemam, ere nigin, amā Negur ī Kristus gare den anidi bun tamal turī fiyen anī kurō mafesidig. Anī ere, Negur ī gare den anidi to turī fediyouf anī momoi ouf are, ī Kristus to turī fiyem.

¹⁶ Ere nigin, Negur ī gare den anidi to turī fediyouf are, ī Kristuseg to turī fiyem.

¹⁷ Negur ī Kristus to turī fiyem are, āgenei momozi are ege, ā āgenei mosor bun fau ubodōgef.

¹⁸ Age fiyam are, idi Kristus nigin momoi de fen, gare den anidig fō delem.

¹⁹ Ada ein mata ibodōya enei nigin dogol, Kristus bun wauda iseya adouf are, ada tamo ganan wal fediya maladalon ado.

²⁰ Anī ere, Kristus momoi bagai gare den anidi bun tamal kel turī fiyen, are idi gare den anidi bun tamal faat uyulil yun gen.

²¹ Are, laa are tamo tekelei bunem isin nigin, gare den neid kel fāyā areg tamo tekelei bunem isif.

²² Are, Adam bun ganan gare dedig, age fiya gen, Kristus bun ganan mata ifenēdiyouf.

²³ Anī ere, idi mugu mugu dogo neid sain bun age difouf: Kristus ī uyulil faat yūyā, anī dumen, ī isiyouf sain bun, idi yagon dibodok anidi, mata ke de fā douf.

²⁴ Anī bure fele di, idikeleya sain isiyouf, sain anī bun, Kristus ī gawaman ganan, yeneid ado ganan, megeir ganan daū fel fen, tano anī yale, Dei Negur ima bun inouf.

²⁵ Ere nigin, ī king ibodok ile, yagon kiwai tar ganan yogo ye farumen inenēdiyouf sain anī bun.

²⁶ Kiwai idikeleya bun daū fiya nē, are laa.

²⁷ Are Negur nē Itotoya bun eig ye irok kilei, “Negur ī ereb ereb ganan yogo ye farumen inenēdin.”* Sain ī irok, are ereb ereb ganan ī farumen inenēdin, are Negur ī ereb ereb ganan Kristus farumen inenēdin, Negur ī yogo enei farumen to ibodok ya anī yaor.

²⁸ Sain Negur ī enei age fel fen, Naal yogo, Negur ī ereb ereb ganan Kristus farumen inenēdin anī, farumen inenēf, anī bunem, Negur ī ereb

* **15:27:** Sam 8:6

ereb ganan nē mudur ibodōf.

29 Mata kel fāya anī sāf are, idi tamo gare den anidi nigin naan dalef idi naig difouf? Tamо gare den anidi to bagai kel turī fediyouf are, ere nigin tamо kayau idi nigin naan daledig?

30 Takag, amā nigin, ere nigin amā mug sain ganan bouwamā waila bun manenēdig?

31 Turau tar, aya ā neda Odug Kristus Jesus bun ubodōgef nigin, yanau alesedig anī bunem, momoi bagai enei totol bagai arok, are aya naa ganan laa bun eledig.

32 Aya tamо nē kisi bunem dogol, Efesus oun gaar kuī geid kusī aun ouf are, ere mala biya anī aya alen? Tamо gare den anidi to kel turī fediyouf are, Negur nē Itotoya bun yenek kilei,
“Saaf ado naan tāf,
ere nigin, nil gare tauf.”[†]

33 Ā taka nem to idegneīf. “Sane geid nigal yūya bun, tobonunā biya daū fedig.”

34 Kisi biya bun kel usig ufareg fen, mosor inoya utorōg, ere nigin, ā atun tunī Negur nigin keleī sā difaref. Aya ā mama yeīf nigin enei wogō auf.

Kel Fāya Nē Bouwa

35 Anī ere, taka nem to fouf, “Tamo gare den anidi, naig fe kel turī fediyouf? Bouweid naig fiya bagai ado disiyouf?”

36 Ā neneya bagai! Ereb õ tu wouf anī, to laa fouf are, anī mata to wō youf.

37 Sain õ tu wof, õ fau ibodōf nē bouwa anī to utenek, anī ere, wit be, ereb taka nē faat dogol.

[†] **15:32:** Asaia 22:13

38 Anĩ ere, Negur ĩ oron kilei, bouwa ifenẽdig, agef fen, ĩ faat fire fire dogo neid bouweid fire fire ifenẽdidig.

39 Bouwa ganan tekelei sā. Tamo nē bouwa are fire, gaar bouwa fire, ninā bouwa fire, gau bouwa fire.

40 Saa ilun nē bouweid ado di, tenebur nē bouweideg ado. Anĩ ere, saa ilun nē bouweid fula fiya medeīya fire di, tenebur nē bouweid fula fiya medeīya areg fire.

41 Gaa are futu reya fire di, ogō are futu reya fire, age fe di, barisa are futu reya fire. Barisa idi atuneg futu reya fire fire ado.

42 Age fiya gen, tamo gare den anidi neid mata kel fāyā areg age fouf. Bouwa tu fiyaf nē are bura le di, bouwa kel fā yef nē are to bura ledig.

43 Sane bun tu fiya di, fula fiya medeīya bun kel fā yef. Totol sā tu fiya di, totol ado kel fā yef.

44 Bouwa buru maug are tu fiya di, uur nē bouwa are kel fā yef.

Bouwa buru maug ibodok are, uur nē bouwag ibodok.

45 Anĩ nigin, Negur nē Itotoya bun eig ye irok, “Uyulil inon tamo Adam ĩ mata ibodōya wō yen.”[‡] Idikeleya Adam ĩ mata ifenẽya nē uur wō yen.

46 Uur nē bouwa ketem to isin, anĩ ere, bouwa buru maug ketem isin. Age fe di, anĩ dumén, uur nē bouwa.

47 Uyulil inon tamo are tenebur aas nē, anĩ dō fiya tamo are saa ilun nē.

48 Tenebur nē tamo idi, tamo teneub nem inon gen. Saa ilun nē tamo idig, tamo saa ilun tamal

[‡] **15:45:** Jenesis 2:7

gen.

⁴⁹ Ada tenebur tamo inon age fiya tabodok gen, adag tamo saa ilun tamal age fiya tabodöf.

⁵⁰ Turau tar, aya ã arokeneik, are tenebur nẽ bouwam Negur nẽ tano to akorou youf. Ereb bura ledig anĩg to bura lauf anĩ to akorou youf.

⁵¹ Karĩ wog, aya waa taka arokeneif: Ada ganan to gare tauf, anĩ ere, ada ganan bouwada falei fouf,

⁵² are ereb fili yeleya be, mala kamisãya gen idikeleya nẽ taur aitouf bun, bouwada agef falei fouf. Taur aite di, tamo gare den anidi kel turĩ fedi di, to buraya nẽ ado fã douf, age fe di, ada bouwada falei fouf.

⁵³ Are, buraya nẽ anĩ to burauf nẽ anĩ ifonũf. Laa fiya nẽ anĩ to laa fouf nẽ anĩ ifonũf.

⁵⁴ Buraya nẽ anĩ to burauf nẽ anĩ ifonũf, laa fiya nẽ anĩ to laa fouf nẽ anĩ ifonũf sain anĩ bun, Negur nẽ Itotoya bun ibodok enei agef kisi fel wõ youf, “Negurem kusĩ bun laa wal fe fen, anĩ adok itob len.”§

⁵⁵ “O laa, ogon kusĩ wal fiya nẽ megeir nain?

O laa, ogon waila nain?”*

⁵⁶ Laa nẽ waila are mosor, mosor nẽ megeir are lo.

⁵⁷ Anĩ ere, Negur de tafiyëf! Í neda Odug Jesus Kristus bunem kusĩ wal fiya ifanadadig.

⁵⁸ Anĩ nigin, neu turau tar oboiyou, totol ufareg. Ereb takam to yokũ yeif. Faimud Odug nẽ kabĩ fatuk bagai walogouf, ere nigin, ã keleï, are ã Odug bun kabĩ walegef anĩ, ege to ilauf.

§ ^{15:54:} Asaia 25:8 * ^{15:55:} Hosia 13:14

16

Negur Nē Tamo Kayau Isennēdiya Nigin Kolekta

¹ Gama Negur nē tamo kayau isennēdiya nē kolekta nigin, ereb aya Galesia sios age difouf nigin arokenēdin anī ago gouf.

² Uub ganan nē naa matu bun, ã mugu mugu, augeneī moni waledgedig anī foig, fire unog fen, kuru gouf, anī bunem, sain aya asiyouf bun, kolekta baban to unogouf.

³ Sain aya wō auf, tamo ã ugirnēdigen anidi bun, pas afeneid fen, ägenei ege luwa ado Jerusalem sur afediyouf.

⁴ Ayag idi geid ileya nigin deuf are, idi aya geid weim malauf.

Pol Nē Wau Irōya

⁵ Aya Masedonia provins atu atu ele fen, ã gein asiyouf, ere nigin, aya Masedonia atu atu alauf.

⁶ Aya ã geid sain naal tabodōf be, yau ado menig sain bun ã geid tabodōf, anī bunem, ã neu iyōya nain be alauf bun usennagauf.

⁷ Aya gama ã ailiyei ken, sain naal ki yeīya anī to orouf. Odug yo youf are, aya sain naal meluk ã geid tabodōf anī wau irok.

⁸ Anī ere, aya Efesus ein abodok ele, Pentikos naa wō youf,

⁹ ere nigin, kabī kaū ado nē sukar odug, aya bun kā fen, age fe di, musei aya kiwai difanaf.

¹⁰ Timoti isiyouf are, ī ã geid ibodōf bun, ī ereb taka nigin to kumī youf nigin lo welegei, ere nigin, ī aya gen Odug nē kabī faali fef.

11 Anĩ nigin, taka nem ĩ yaleya nigin to itorōf. Yogan delẽ bun wau inosiya ado sur wiyege di, ĩ aya gein kel isiyouf. ĩ tura tar geid disiyouf nigin, aya ololo afedif.

12 Neda turada Apolos nigin, ĩ tura tar geid ā gein dilauf nigin, aya totol bagai arokenen. ĩ gama ileya nigin wau yenēya sā, anĩ ere, ĩ ileya nigin sain biya isiyouf are, ĩ ilauf.

13 Lo welegei, momoiya bun totol ufareg, tamo totol ado kumī sā wōg, totol waleg.

14 Ereb ereb ganan wau laa fiya bun ago gouf.

15 Ā keleī, are Stefanas nē ibor, Akaia provins oun uyulil momoiya tamo kayau wō de fen, idi dogo neid oroya dō de, Negur nē tamo kayau disennēdiyouf nigin, kabī totol daledig. Turau tar, aya totol bagai arokeneik,

16 are ā eneidi age fediya ado, idi ganan kabī bun disi fen, kabī dalef anidi farumen ubodōg.

17 Sain Stefanas, Fotunatus ado, Akaikus wō den, aya wau al fen, ere nigin, ereb ā bun tamal ifanamāya anĩ, idim ā fotokar difanaman.

18 Are, idi age dife di, neu uur ado āgeneig filolō fen. Anĩ nigin, tamo age fediya nigin de fiyēdiya nē kisi walogoouf.

Idikeleya Nē Aanya

19 Asia provins bun sios idi, ā bun aanya sur difef. Akwila Prisila ado aanya, wau sere fiya ado Odug bunem ā bun sur difef. Sios idi neid fō bun guru difedig idig age difef.

20 Ein tureī tar ganan ā bun aanya sur difef. Ā abob aan wiyeğ fen, fateul bunem umā gouf.

²¹ Aya, Pol imauum bagai aanya enei atotof.

²² Taka ū Odug nigin wau to laa fouf are, isisīya
ū bun isiyouf. O Odug, usi!

²³ Odug Jesus nē wau ifenēya, ā bun ibodōf.

²⁴ Neu wau laa fiya, Kristus Jesus bunem ā
ganan bun ibodōf. Momoi.

**Mata Ifenēya Nē Od
The New Testament in the Marik Language of Papua
New Guinea
Nupela Testamen long tokples Marik**

copyright © 2011 Wycliffe Bible Translators, Inc.

Language: Marik

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 0868934534

The New Testament

in Marik

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-07-22

PDF generated using Haiola and XeLaTeX on 18 Mar 2025 from source files
dated 31 Aug 2023

d7099f9d-3bdf-5620-8eb3-7e6c51cab7ea